

জনৈকা যুক্তিহীনা নারী

www.BanglaBook.org

মুহম্মদ জাফর ইকবাল

জনৈকা যুক্তিহীনা নারী

রিগা বিশাল একটি ঘরের মাঝখানে দাঁড়িয়েছিল। ঘরের একটি বড় অংশে স্বচ্ছ সিলিনিয়ামের ঝকঝকে আয়না। সেই আয়নায় রিগার প্রতিবিম্ব ফুটে উঠেছে। রিগা তীক্ষ্ণ দৃষ্টিতে তার প্রতিবিম্বের দিকে তাকিয়ে আছে, সে অত্যন্ত সুপুরুষ। তার কুচকুচে কালো চুল, দীর্ঘ পেশীবহুল দেহ। মসৃণ ত্বক এবং ঝক-ঝকে বুদ্ধিদীপ্ত চোখ। তার শরীরের উপর আলগা-ভাবে একটি অর্ধস্বচ্ছ নিও পলিমারের কাপড় জড়ানো রয়েছে। নিজের দিকে তাকিয়ে থেকে সে তার মুখে একটা সন্তুষ্টির মত শব্দ করে জানালার দিকে ঘুরে এল। ঠিক এরকম সময় দরজা খুলে তার দীর্ঘদিনের সঙ্গিনী গুণু ঘরে প্রবেশ করে। রিগাকে দেখে গুণু হঠাৎ থমকে দাঁড়াল, তার চোখে মুখে একই সাথে বিস্ময় এবং শঙ্কার এক ধরনের ছায়া পড়ে। রিগা মুখে হাসি টেনে এনে বলল, কেমন দেখছ গুণু ?

গুণু কয়েকমুহূর্ত কোন কথা বলতে পারে না। খানিকক্ষণ চেষ্টা করে বলল, তুমি- তুমি পুনরুজ্জীবন ঘরে গিয়েছ ?

হ্যাঁ গুণু।

কেন ? তোমার তো সময় হয় নি।

একটু আগেই গেলাম। কেমন কাজ করেছে মনে হয় ?

গুণু একটা নিঃশ্বাস ফেলে বলল, ভাল। খুব ভাল।

দেখতে যেমন ভাল দেখাচ্ছে আমার ভিতরে লাগছেও সেরকম চমৎকার। তুমি বিশ্বাস করবে না আমি ভিতরে কি রকম একটা শক্তি অনুভব করছি।

সত্যি ?

হ্যাঁ-আমি জানতাম না, পুনরুজ্জীবন ঘরের এত উন্নতি হয়েছে। শরীরের সব জীর্ণ কোষ বদলে দিয়েছে। শুধু তাই না মনে হয় মস্তিষ্কে নিউরন সেলেও কিছু কাজ করেছে, খুব ভাল চিন্তা করতে পারছি।

সত্যি ?

হ্যাঁ, ছয় মাত্রার একটা অনুপৌণিক সমীকরণ ছিল কখনো আমি সমাধান করতে পারি নি। পুনরুজ্জীবন ঘর থেকে বের হবার পর মস্তিষ্কটা এমন সতেজ লাগতে লাগল যে ভাবলাম সমীকরণটা একটু ভেবে দেখি। তুমি বিশ্বাস করবে না গুণু সাথে সাথে সমাধানটা বের হয়ে গেল।

শুণু রিগার উচ্ছ্বাসে অংশ নিতে পারল না। কপাল থেকে চুলগুলি সরিয়ে নিচু গলায় বলল, ও।

শুধু তাই না, খাওয়ার রুচি বেড়ে গিয়েছে দশ গুণ। আগে যেটা খেতে পানসে লাগত হঠাৎ করে তার স্বাদ বেড়ে গেছে। স্নায়ুর মাঝেও কিছু একটা হয়েছে। রিগা শব্দ করে হাসতে হাসতে বলল, আনন্দের অন্য জিনিসগুলি তো এখনো চেষ্টা করে দেখিই নি।

শুণু রিগার হাসিমুখের দিকে এক ধরনের বিষণ্ণ চোখে তাকিয়ে থাকে। তার হাসি খেমে যাবার পর নিচু গলায় জিজ্ঞেস করল, রিগা, তুমি এখন কেন পুনরুজ্জীবন ঘরে গেলে? এখনো তো সময় হয় নি।

রিগা খানিকক্ষণ শুণুর দিকে স্থির চোখে তাকিয়ে থেকে তারপর একটা নিঃশ্বাস ফেলে বলল, তুমি তো জান শুণু কেন আমি পুনরুজ্জীবন ঘরে গেছি। আমরা সবাই তো যাই। যেতে হয়। তুমিও যাবে।

শুণুর কোমল চেহারায় হঠাৎ এক ধরনের তীব্র ব্যথার ছায়া এসে পড়ে। রিগা তার মুখ থেকে চোখ সরিয়ে নিয়ে নরম গলায় বলল, আমি দুঃখিত শুণু। তুমি তো জান একদিন আমাদের একজনের কাছে থেকে সরে যেতে হবে। আমরা তো আর সবসময় একসাথে থাকতে পারি না—

শুণু কোন কথা বলল না, হঠাৎ করে তার চোখে পানি এসে যায়, সে প্রাণপণ তার চোখের পানি আটকানোর চেষ্টা করে।

রিগা একটু এগিয়ে এসে শুণুর মাথায় হাত রেখে বলল, ছিঃ শুণু, কাঁদে না। এর মাঝে কাঁদার কিছু নেই। এটা হচ্ছে জীবন। মনে নেই তোমার আর সুরার যখন ছাড়াছাড়ি হল তখন তুমি কেমন ভেঙ্গে পড়েছিলে? মনে আছে?

শুণু মাথা নাড়ল। রিগা নরম গলায় বলল, তারপর আমার সাথে তোমার পরিচয় হল। আমরা ঘর বাঁধলাম—কী চমৎকার একটা জীবন হয়েছিল আমাদের। ঠিক সেরকম আবার আমাদের চমৎকার জীবন হবে। তোমার সাথে দেখা হবে অসম্ভব হৃদয়বান কোন পুরুষের—সব দুঃখ মুছে নেবে তোমার। আমার কথা ভুলে যাবে তখন।

শুণু হাতের উল্টো পৃষ্ঠা দিয়ে চোখ মুছে মৃদু গলায় বলল, রিগা, আর কয়দিন আমরা একসাথে থাকতে পারি না? আর মাত্র কয়দিন?

রিগা নিচু গলায় হেসে ফেলল, বলল, ছিঃ শুণু, ছেলেমানুষী কর না! আর কয়দিনে কী এসে যায়? কিছু আসে যায় না। তুমি সেই প্রাচীনকালের মানুষের মত কথা বলছ! আমি কতবার তোমাকে বলেছি প্রাচীনকালের মানুষের জীবন নিয়ে এত ভেবো না। সেই জীবন

শেষ হয়ে গেছে।

শুণু চোখ মুছে নিঃশ্বাস ফেলে বলল, জানি। কিন্তু- কিন্তু আমার কী ভয়ংকর লোভ হয়-

রিগা বিস্ফারিত চোখে শুণুর দিকে তাকল, অবাক হয়ে বলল, কীসের লোভ হয় ?

আমার-আমার একটি সন্তান হবে। ছোট একটা শিশু-আঁকুপাকু করবে-আর আমি বুকে চেপে ধরব।

রিগা হতচকিত দৃষ্টিতে শুণুর দিকে তাকিয়ে রইল। খানিকক্ষণ সে কোন কথা বলতে পারল না, তারপর একরকম জোর করে বলল, সন্তান ?

হ্যাঁ।

কিন্তু-কিন্তু-তুমি তো জান সন্তানের প্রয়োজন শেষ হয়ে গেছে। একসময় সন্তানের প্রয়োজন হত কারণ মানুষ বুড়ো হয়ে মারা যেত। তাদের স্থান নেবার জন্যে নূতন মানুষের প্রয়োজন হত ! এখন আমরা মৃত্যুকে জয় করেছি, প্রকৃতির নিয়মে বাধক্য আমাদের স্পর্শ করে না। আমরা মারা যাই না। আমাদের আর সন্তানের প্রয়োজন নেই।

শুণু নিঃশ্বাস ফেলে বলল, আমি জানি।

এক সময় মানুষের আয়ু ছিল ষাট সত্তর বৎসর ! এখন আমি আর তুমি একসাথে ঘর করেছি সাড়ে ছয় শ বছর! তার আগে আমি যে মেয়েটির সাথে ছিলাম সেখানে ঘর করেছি চারশ বছর। তার আগে-

আমি জানি। শুণু নিঃশ্বাস ফেলে বলল, আমরা সেই কতকাল থেকে বেঁচে আছি আর আমরা বেঁচে থাকব আরো কত মহাকাল ! কিন্তু তবু আমার মনে হয় আমি যদি ছোট একটা শিশু পেতাম-

রিগা বিস্ফারিত চোখে এই সম্পূর্ণ যুক্তিতর্কবর্জিত প্রায় উন্মাদিনী মেয়েটির দিকে তাকিয়ে থাকে। এই ধরনের অর্থহীন হাস্যকর কথা কেউ বলতে পারে সে নিজের কানে না শুনলে বিশ্বাস করত না।

মানুষ সত্যিই বড় বিচিত্র।